

Mientras cu e no firma procesverbal...

Booshi Wever por ta Ministro di husticia remplazante?

ORANJESTAD (AAN) Mas y mas hende ta cuminsa haci pregunta riba e forma di proceder y di actua di husticia na Aruba pasobra e caso di maltrato unda ministro Booshi Wever tabata involvi te ainda no na bay corte.

Asina tambe publico ta sigui reacciona;

"Un ministro kende tabata involvi den un caso di maltrato y te awe polis no por logra haye pa e firma e procesverbal di e caso penal, no por keda como ministro".

"Esaki ta un logica di bon gobernacion cu keto bay e gobierno aki no por of mihor bisa no kier compronde pasobra pueblo ta wak bon cla cu esey no ta cumbini nan tampoco".

"Cu 12 marioneta den parlamento e gobierno actual, segun pueblo ta sinti den carni y weso tur dia, ta kere cu nan ta pega cu super glue riba e stoel dushi cu ta genera miles y miles di florin pa luna na salario di parlamentario y ministro".

"Ningun gobierno democratico na mundo tey pa eternidad, pero aparentemente viahenan frecuente pa Cuba a pone cierto parlamentarionan y mandatarionan kere cu na Aruba nos ta den e mesun situacion di dictadura comunista manera cu Fidel a bin ta impone riba e pueblo Cubano y algun ta kere cu na Aruba tambe esaki lo ta posibel pasobra e 12 asiento nan a pone varios politico nan cabses susha anto formal".

"Cu arogancia bo no por goberna un pais y menos cu un actitud caminda cu bo ta kere cu bo por mustra pueblo cu ta boso por haci loke boso ta haya ta bon pasobra boso tin mayoria den Parlamento".

"Parlamentarionan di e grupo di marioneta no a sinti ainda kico ta rosea cayente di pueblo, pero no lo dura mucho cu pueblo no por wanta mas presion di mal gobernacion y e ora ey ta laat pa esnan cu a kere cu e mayoria den Parlamento tabata algo pa eternidad".

"Ki mishi un ministro ta bringa riba caya anto te awe ni polis, ni Ministerio Publico a actua contra dje?"

"Ki mishi un ministro ta bringa riba caya y te awe ningun miembro di Parlamento a exige pa e ministro bay duna cuenta den Parlamento pasobra na cualkier otro pais drechi ta mesora den Parlamento mes nan lo tuma medida contra e mandatario cu a mal comporta su mes, pero na

Aruba 12 parlamentario di MEP ta bay ciegame na amen di loke ministronan y partido ta dicta pa nan".

"Ministro Booshi Wever ta esun kende ta reemplaza ministro di husticia Rudy Croes ora e ministro di husticia tin cu bay den exterior".

"Ta cu ki cara y cu ki autoridad un ministro kende tabata involvi den un caso di maltrato fisico riba caya por bay reemplaza un ministro di husticia, si keto bay polis mes ta buscando e ministro pa e firma un procesverbal di maltrato?"

"Na Den Haag, gobierno Hulandes pronto por bolbe bay baha riba cabses di Nel cu Rudy pa cu e asunto aki pasobra un hende kende ta maltrata otro hende riba caya hamas y nunca por sinta riba e stoel di ministro di husticia".

"Dia cu Nel Oduber como prome ministro a yama ministro Marisol pa 'broedende Kip', esta galiña cloks, a pone

cu a bin pleito den partido y despues nan a kita e puesto di vice prome ministro di Marisol, siendo cu Marisol no a haci net net nada malo, pero ministro Booshi Wever ta bringa na aeropuerto y e si por keda reemplaza un ministro di husticia".

"Esaki ta e Orden y Prosperidad cu e mayoria cu a vota pa MEP ta haya como danki y tambe tur esnan cu no a vota pa MEP?"

"Palabra awor ta na Prome Ministro y ta di spera cu e no bolbe perde cabses, pero pa e splica pueblo den palabranan

chiquito a base di kico ministro Booshi Wever por ta ainda ministro reemplazante di ministro di Husticia y con e ta hustifica esey".


Ta di spera cu Prome Ministro no rabia cu pueblo kier haya sa con e asunto aki ta hinca den otro y ta di spera tambe cu Prome Ministro ta compronde cu tarea di prensa ta pa informa pueblo y manera cu hues mes a dicta den su ultimo sentencia caminda cu gobierno kier a censura DIARIO y prensa, cu prensa tin e tarea pa trece un balance den e pais.



Velocidad halto no ta na bo beneficio. E por costa bida di hende. Sea asina bon di respeta nos borchinan di velocidad.

Esaki ta un mensahe di Ministerio di Husticia

E MACAMBA PRETO TAMBE KIER COME!!



BEST DEAL

Tel: 5827100

(Pariba di Aruba Bank, Paradera)

BEST SHOPPING DEAL

Turibana Plaza

Tel: 5865455

